

Liewer Barack Obama, liewer Mister Brässident

Isch schreib Ihne uff kurpfälzisch, weil bschdimmt a äner vun Ihre Vorfahre aus de Palz kummt. In de Zeidung haww isch gelese, dass Ihr Ur,-Ur,-Ur,-Ur-, Ur-,Urgroßvadder im Schwoweland gebore isch und in so'me Internet-Film'l haww isch g'hert, wie Sie schwäwisch schwätze – do werre Sie misch schun aa verschdehe, denk isch emol.

Liewer Mister Bräässident, Sie hawwe jo grad en Haufe Aaweit: Den Umzug ausm Irak, des Hi un Her mit dem Gwandanamo, den Ärger mit denne raffgierische Bänker, ä gscheidi Krankeversicherung solle Sie higrieje und so newebei a noch den Glima-Wandl uff'd Reih bringe – sescht unser Angela. Und grad deswege schreiw isch Ihne! Ich war neemlich neilisch s'erschde Mol selwer in IHRM Länd'l und do isch mir uffgfalle, wie mer en Haufe Energie eispare und noch dezu gsünder lewe kennt, was dann widder dere Krankeversicherung gut dät.

Also, isch an Ihrere Schdell, isch det zuerscht emol abschaffe, dass mer von morgens bis obends in alles Drinkbare Eiswiafel neigriggt – Aisgjubs sescht mer jo bei Eisch: Aisgjubs in de Orangschesaft, Aisgjubs in de Tee – „Aistii“ heeßt des dann und schmeckt aa wiaklisch net schlescht! Vum Friihstigg bis zum Obendesse musch Eiswasser drinke und alle Flasche un Bigse lieje in Badwanne voller Eiswiafel. Was des Schdrom koscht! Un gsund isch des aa net, immer des kalde Zeig im Mage!

Un dann die Glima-Olage! Wu mer hikummt ischs arschkalt (Sie werre entschuldige, awwer mir redde hald so!) Im Hodell-Zimmer, im Turischdebus, im Schuhlade – iwwarall arschkalt! Wu jezz ä Grupp vun Schadträt mit ihm Owwerbürgermeischder (Nä, nä! Net verschregge! S'ware ned schunn widder Heidelberger wege ihrere Ami-Siedlung!), also wie die Grupp in Käsäs ihr Schweschder-Schadt bsucht hot, isch hinnerher die halb Delegazion krank gewest. Un de Owwerbürgermeischder hots am schlimmschde verwischd, dem ischs rischdisch schlescht gange.

Sie kenne mers glawe, Mister Brässident : Des kummt alles bloß von denne Glima-Olage und von denne Aisgjubs! Des isch neemlich **nicht** gsund! Losse ses äfach bleiwe! De isch bessers fers Glima un fer Ihr

nei Krankeversicherung a! So, des haww isch Ihne bloß emol sare wolle! Nix fer ugut!

Ihr Fän vum Negger

Bevor ischs vergess: Wenn Sie des Film'1 do uf Youtube noch net gsehe hawwe, gewwe Se bei google äfach „Obama schwäbisch“ ei. Sie lache sisch krank! Un krank lache isch uf jeden Fall gsünder wie Glima-Olage und Aisgjubs!